

Inissiani attartortittakkani ineqarnermut tapiissutit pillugit inatsisartut peqqussutaata allangortinneqarnera pillugu Inatsisartut peqqussutaat nr. 13, 14. november 2004-imeersoq. (Ineqarnermut tapiissutit iluarsivigineqartarneranni piffissaliussap allangortinneqarnera kiisalu ineqarnermut tapiissutinik qinnuteqaqqinnissamik piunasaqaatip allangortinneqarnera) Atuussimasoq (Historisk)

§ 1

Inissiani attartortittakkani ineqarnermut tapiissutit pillugit Inatsisartut peqqussutaanni nr. 3-mi, 31. maj 2001-imeersumi imatut allanguisoqarpoq:

1. § 9, imatut oqaasertalerneqarpoq:

" § 9. Inissiani attartortittakkani ineqarnermut tapiissutit ukiup naatsorsuuteqarfiusup naanerani aamma ineqarnermut akiliutit allangortinneqarneranni iluarsivigineqartassapput. Inissiaq attartortittagaq najugaqatigiiffimmut ilaappat ineqarnermut tapiissutit ukiuata najugaqatigiiffiit ataasiakkaat ukioq naatsorsuuteqarfia malissavaa. Inissiaq attartortittagaq najugaqatigiiffimmut ilaangippat ineqarnermut tapiissutit ukiuata qaammatisiutit ukiuat malissavaa.

Imm. 2. Ineqarnermut tapiissutisartut ineqarnermut akiliutip allanguutaanik kiisalu inuttut aamma aningaasaqarnikkut pissutsit allanguutaannik ineqarnermut tapiissutinik annertussusiliinissamut pingaaruteqartunik kommunimut nalunaaruteqarnissaminnik pisussaaffeqarput.

Imm. 3. Imm. 2-imi taaneqartut paasissutissat ineqarnermut tapiissutisartup tunniussimangippagit kommuni missiliuilluni paasissutissanik pisariaqartunik aalajangersaasinnaavoq."

§ 2

Inatsisartut peqqussutaat 1. januar 2005 atuutilerpoq.

Namminersornerullutik Oqartussat, ulloq 14. november 2004

Hans Enoksen

/

Asii Chemnitz Narup